

# Huet

## I.

Ne me sont pas ocheson de chanter  
Pré ne vergier, pleseïs ne buisson;  
Quant ma dame le plect a comander,  
N'i puis trover plus avenant reson.  
Si m'est mout bel que sa valour retraie,  
Sa cortoisie et sa beauté veraie,  
Dont Deus li vout si grant planté doner  
Qu'il en covient les autres oublier.

## II.

Et nonporquant, mout dout l'emprison  
Qu'ai en mon cuer fete de li amer.  
Bien sai de voir qu'ambedui i mourron;  
Mais nus ne doit si bele mort douter;  
Decevanment qu'autres sens me desvoie,  
Tres granz amorus qui m'ensaingne tel voie  
Qu'a mon vouloir moi et mon cuer tendron,  
Mais, par mon chief, ja n'en departiron.

## III.

Ja ne pourrai ma grant joie achever;  
Mourir m'estuet en lieu de guerredon;  
Soëf trait mal qui en cuide eschaper,  
Tels confors est d'atendre guerison.  
Mes sanz espoir me tormente et esmaie  
Iceste amors, qui m'ocit et apaie;  
Merci me fet en ma dame cuider  
Tel que reson n'oseroit creanter.

## IV.

Biens et beautez sont en li compaignon,  
Sens et valors les i fist assambler;  
Quant je regart son cors et sa façon,  
Quant plus ai cuer, plus m'i couvient penser.  
Quant je la vi, bien soi que j'en morroie;  
Plus m'ociroit quant je plus la verroie  
Mis grans desirs par si belle ocheson;  
Dont ja n'avrai sanz joie reanson.

## V.

Adès cuidai ma grant dolor celer,

Que nel seüst la bele o le dous non.  
N'el nel savra. Qui li doie conter  
Quant nus ne set m'angoisse se je non?  
Dit ai que fols: ja nus hom qui la voie,  
Tant nices n'est, que bien ne saiche et croie  
Que j'aim celi que tant m'oëz louer,  
Por tant qu'ele est bele et bone sens per.

VI.

Fins amoureux, touz jours di et diroie:  
N'est pas amis qui contre Amour guerroie;  
Puis qu'ele vuet dedans fin cuer entrer,  
Vers sa vertu ne puet sens foisonner.

- letto 559 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/huet-35>